

光緒鎮海縣志

鎮海縣志

名宦傳目錄

宋

柳永

鄭洙

趙善譽

徐杲

唐叔翰

趙欽夫

陳造

陳纘

韓永德  
崔端學

商逸卿

趙若珪

趙秘夫

施廷臣

陳文

虞萬

戴栩

張玘

林鼎

汪元春

趙崇禪

趙汝濂

史蒙卿

元

王煦

阿察赤

龐思恭

張輔

忻都

曹敏中

薛炳

張子忠

馬元德

汪汝懋

吉雅謨丁

許原

明

包萃

杜彬

何公肅

陸本

許伯原

高敏

馬興

賀懋

劉福

余斌

宋宣

陳純

李廷儀

錢如京

陳軾

鄭餘慶

田維

戚繼光

俞大猷

張四維

盧鏜

劉錦

周懋

龍德孚

劉孔愚

曹一和

金九成

康良臣

宋繼祖

何愈

詹近陽

章光斗

趙思基

丁鴻陽

王嘉賓

時偕行

汪應泰

鄧全性

劉國縉

樊王家

文在燮

陳懋齡

俞某

黎民表

劉宗堯

顧宗孟

趙養沖

朱德孚

顧充

安世鳳

孫錫爵

許成章

賈若儼

任中英

廖鵬舉

龔 夔

戴洪淮

葉國華

朱懋華

國朝

鄭元成

馮起龍

邵葉槐

吳光育

王 召

常進功

王元士

張 玲

牟大寅

周家齊

蔣茂沈

唐鴻舉

黃宮柱

林徵徽

蔣名世

田長文

楊國幹

譚世選

杜琦

趙應召

洪熙揆

邵向榮

馮大位

胡隆

楊玉生

王夢弼

荆德瑗

周樽

陳焯

胡龍光

戴彝

郭淳章

呂璜

李向陽

金萼

張振夔

羅以智 鄒志初

孫玉田

補遺

舒謨

裘秉彝





鎮海縣志卷十九

名宦傳

邑自唐季始設望海縣去今千年令長姓氏尙缺  
焉不可考况政績乎入宋始稍稍有良吏事蹟見  
於舊志由元迄明而德政之碑輿人之誦較前代  
爲有徵矣

國朝聖聖相承精求吏治召父杜母接踵而起海濱  
絃歌之化於茲爲盛以及丞簿教職亦有盡力贊  
襄無慙一命者民思其澤至今不衰他若閩帥裨  
將或恩浹戎行或身殞鋒鏑其捍衛巖疆功烈亦  
詎容湮沒是以搜訪簡冊一一臚列之庶幾官斯

土者有所觀感而興起乎

宋

柳永字耆卿崇安人景祐中登進士嘗爲定海鹽場大使

登阜羨羸以鼓聞累官屯田郎

嘉靖志

案舊定海縣志言耆卿嘗攝昌國縣事考新唐書

大曆六年廢翁山縣以其地屬明州至宋熙甯六

年始立昌國縣景祐時無昌國縣似定海志所云

攝令未確也

聽思堂彙

鄭洙至和二年以殿中丞爲邑令地瀕於海民苦水鹹洙於縣東相視泉脈知來自西者甘乃浚池以石甃四旁其廣二十餘丈長半之而其深得長四之一邑人咸蒙其利

嘉祐二年遷國子博士

寶慶志

趙善譽字靜之一字德廣太宗之後乾道五年進士授昌國主簿爲民辨曲直皆明達平允邑人相與愛服之郡守俾攝定海事海盜竊發捕得全黨郡欲奏以上賞善譽言攝令捕盜不足爲功誠不願以人命希賞典郡守感其言爲奏貸羣盜殊死改攝慈谿其後昌定慈三邑父老皆道其德政遷知臨川通判常州官至潼川府路提典刑獄年

四十七卒

政魏集

徐杲

案乾隆志杲作木誤

字子才金華人爲人高明奇偉試輒有聲

公卿爭知之得宰富陽甯宗時爲定海令有治行民甚德之杲與陳亮友善亮嘗言杲之特立乃己之所願學也及

杲死亮爲文志其墓

龍川集參  
乾隆志

唐叔翰淳熙十四年冬以通直郎出補定令甫下車間民  
利病而興罷之時循行境內見東南北三面瀕海其山麓  
盤旋汚泥積淤之區盡可田也謀諸水軍統制王彥舉統  
領董珍奏請於朝得錢緡庾粟若干倣錢塘制伐石甃岸  
六百二丈五尺外禦風濤內成膏壤民利賴之尋監潭州

南嶽廟

寶慶志

趙鈇夫淳熙十六年以宣教郎知定海縣有循良譽以不  
合於上官去任後令陳造有寄鈇夫交代詩曰縣尹古子  
男今不一錢值祇催奉簡書偵伺常屏息白簡與案章歲  
月供彈劾富路雖所惡姦民巧狙擊吻間售蓬蒿意外變

黑白防虞莫救過彌縫或逃責政使有卓魯未容置形迹  
云何事難事君不動聲色編民翁風移惡少且心革田廬  
有笑歌魍魅亦竄匿斯人紀仁愛幾磨南山石政聲懿如  
此僅免繩治厄諸公蜚鶚書犯嚴尙遺力安得定海民爲  
君灑薦墨蘭臺傳循吏采訪多失實安得定海人爲君秉  
直筆嗟我吏隱者志在山南北身名萬金重如博試此擲  
賴今遺愛地一一可矜式政恐效西子美嘖得嘲劇江臯  
一樽酒聊挽朝天客妙樂喧江浪清譚到理窟盟言底遽  
寒舟駛潮水急西望念風義感歎徒至骨

寶慶志參乾  
隆志藝文

案寶慶志趙鉞夫淳熙六年六月二十三日到任  
紹熙二年七月初二日滿而云陳造於是年是月

是日到任則交代者卽鈇夫也舊志造有傳而遺

鈇夫殊爲缺漏故補之

聽思堂

陳造字唐卿淮之高郵人由進士尉繁昌改教授平江府  
紹熙二年以宣德郎知定海縣勸耕課農有治行授朝散  
郎淮安路安撫司參議最工詩文著有江湖長翁集四十  
卷陸游序其集謂能居今篤古卓然傑立頽波之外范成  
大亦言使造遇歐蘇名不在少游下云

成化志

陳纘其祖某固甯宗朝名相也纘少習於學寶慶三年冬  
以通直郎知定海壹意字民爲政不擾以治尤留情造士  
以儒學自邑令韓承德商逸卿崔端學創建後閱時旣久  
多所圯蠹纘重修之規制較前更壯士林翕然頽之紹定

元年夏泮池蓮出雙萼咸以爲瑞歸美於續焉

廷祐志

趙若珪字玉父金壇人擢上第監慶元府三石橋酒庫秩滿丁憂服闋辟監穿山硤鹽場場創於嘉定初規模褊陋若珪撤而新之條上事宜十數使者頒示諸場以爲永式仍與連帥上其功遷知安吉縣紹定間卒

劉宰撰  
嘉志

趙秘夫嘉定十一年以宣教郎爲邑令加意學校學租舊收米穀計八百石職掌不明遂多湮沒秘夫至任追還舊租之數勒諸碑石並撥官產以埤之俾養士得加焉

續慶志

施廷臣嘉定十四年以宣教郎爲邑令勤恤民隱明年與水軍統制陳文續葺石塘五百餘丈塘有峻坂捍禦甚固又於石塘盡處增築土岸三百六十丈立永賴海晏亭

陳案



志彙言永賴亭信熙十六年通判  
林炯所立舊志與海晏並書誤已  
廷臣以覃恩轉承議郎  
十七年十一月去任民咸稱之

寶慶志

虞萬宇維遠吳人紹定中爲定海令孜孜撫字率以躬行  
爲先甫月餘百廢具舉築塘捍海濬河墾田問俗行縣無  
間寒暑所至輒理詞訟咸得其情未期卒於官民哀悼之  
且憐其子之幼孤扶柩葬於定之孔浦立祠歲祀後其子

神祐遂家焉

嘉靖志

戴栩永嘉人嘉定間爲主簿七年十月權台事次年創立  
靜安迎恩兩門於城中坊巷設門牌各以舊事標名豎立  
郡守程覃委拓學宮凡儀門泮池直舍學齋增建一新著  
蹟甚多而其攝篆僅九月云

寶慶志

張升字端衡金壇人嘉定間爲句容尉秩滿爲浙東茶鹽使者以四明穿山鹽場課入厚而積弊多知升在句容以廉著卽以名辟上升至潔情自律竈戶歌舞之其去也航海追送有號泣不忍別者

劉宰撰墓志

林鼎字伯和一字元秀黃巖人刻意爲學師事朱子乾道八年舉進士授奉化主簿淳熙間遷定海丞郡令受租輸粟縱民自槩量吏爭曰數不足當復坐粟故行之卒無欠富人用本路常平使籍傲不受釐稅之如令常平檄使改役鼎曰私產可公檄乎不許常平捕其曹吏幾盡將爲名以劾會其罷而止先是朱子變荆浙東遇歲祲力行救荒之政鼎所上賑濟法及議陂塘水利皆得古人遺意至

是疏薦於朝言彙爲丞敦篤曉練爲衆所稱擢知侯官尋

通判筠州紹熙三年卒年四十九

水心集參  
乾隆志

汪元春字景新奉化人少穎悟受詩學於太學余正君學  
論王貫道嘉熙四年成進士調上虞尉適浙東提舉茶鹽  
司議置鹽倉定海而經始難其人僉謂莫元春若遂辟爲  
監官既至厥宇一新民不知役凡所立出納後人皆可遵  
守任滿去以選辟沿海制置司準備差遣仕至知興化軍

黃氏

日鈔

趙崇禪字叔茂武康人淳祐十年進士調樂清尉監穿山  
鹽場民不擾而課溢額其才有過人者性孝以穿山多海  
風母不樂之乃請檄奉以歸

黃氏  
日鈔

趙汝濂字文浩信州鉛山人爲定海尉邑舊多寇汝濂設方略擣其穴捕獲甚衆且請止戮其爲首者制置使大喜上其功兼以佐開河渠遷奉新丞官至通判建昌軍黃氏日鈔史蒙卿字景正鄞縣人咸淳元年進士授景陵主簿尋爲穿山鹽場司諭義勸輸戶不知有筆楨十年改江陰教授宋亡遂不復仕爲學淹博著書立言一以朱子爲宗袁清容集

參鄞志

元

王煦字本明一字南歧宋相文正公旦十二世孫登天曆進士元統間爲縣尹操持廉介多著惠政民甚德之秩滿見元政不綱解組隱居於縣西之五里牌村建文正祠朝

夕焚香讀書其中於宅前築石橋勒西歸二字以寄志焉  
士民頽其堂曰仰德號其祠前之池曰碧波志清廉也今  
子孫繁衍世居其宅

乾隆志

阿察赤蒙古人泰定四年以承務郎知縣事爲人儀端語  
莊尤以教學爲己任謂教諭汪宗江曰學必聚書冥行空  
言講習何補乃與主簿龐思恭首捐俸資置經史子集共  
二千二百四十六卷藏之縣學刻石列目以示永久士皆

誦之

袁清容集

張輔字友仁河南人端方有守而贍於文詞優於事業敷  
歷州縣所至有廉能聲至元三年來爲邑令門無私謁惟  
訪問謠俗人民所便利及所廢圯者以次興補其汲汲於

爲政如此

至正志

忻都蒙古人至治二年爲縣達魯花赤適歲大歉民負官  
逋計一萬有奇忻都覈其實止輸奇於官復相鹽賦若干  
嚴飭官驛置隸人以候過客而免其役又與尹曹敏中主  
簿薛炳重修縣治蓋其政汲汲慕古云

哀情  
容集

張子忠其先江左定遠人以識會蒙古文字舉譯進士  
至順間奉詔賑浙西饑才略警敏授定海鹽運長山司惠  
寵恤民懷其德爲立祠以祀至元四年復轉清泉司令  
時鹽課不清民苦煎辦子忠按其弊知有絕竈積逋轉相  
披累亟聞於運司請豁免羣恣歡舞至正六年嘗大饑首  
捐俸及米爲當事暨富人倡郡守王元恭嘉其事于忠念

定邑風俗淳美遂卽署側構數椽家焉今崇寧有張門廟  
其遺愛也

乾隆志

馬元德世居燕山登進士第嘗辟江南御史遷職耿介廉  
慎學道愛人至正十九年選爲定海令抑黠疾弱鋤梗擿  
姦均征徭寬稅斂周卹民隱事有牽制卽躬白於省一年  
而民信之又一年而民頌之三年而民惟恐其去二十二  
年春陞知奉化州

羽庭集

案乾隆志職官表元達魯花赤馬元德無年分注  
或云卽馬哥字而馬哥爲達魯花赤舊志云至正  
元年任今考羽庭集送馬侯元德任奉化州序末  
云至正二十二年夏劉仁本序又仁本撰定海縣

興修儒學記亦云至正二十一年冬馬侯元德營  
修講堂日不暇給未底於完代去又據仁本饒定  
海縣尹汪以敬序言至正十九年省垣知進士馬  
君元德之賢擢尹茲邑三年政成汪君以敬代之  
是元德實於十九年宰吾邑而馬哥旣於至正元  
年任相去太遠必係二人不得以馬元德謂卽馬  
哥字也又羽庭集言馬元德爲令定海舊志云爲

定海達魯花赤亦誤

聽思  
堂稟

汪汝懋字以敬清安人

案乾隆志云  
桐廬人誤

自幼警敏絕人讀書

過輒不忘中至正十年乙榜考官柳貫薦授丹陽教諭調  
青陽未幾授定海縣尹以禮讓化民有兄弟旣分而後合



者有讓爭田而不取者亦有婦勸其夫以和義者汝懋皆造門獎勵之他郡富人僑居縣南鄙同邑子盡殺一家而以其貲去久之罪不正逮繫且百人汝懋驗治三歲兒盡得其隱伏殺人者論死餘皆釋不問有盜夜劫民財民疑其鄰愬之官汝懋時適公出其條鞫鄰便當罪汝懋察其寃爲變獄辭僚恚出訕語汝懋不爲動旣而鄞縣獲眞盜事遂白民有酤釀佃人家佃人被醉夜歸以杖擊其壁壁壞缶甕盡傾壓酤釀人亟起護其器俛中擊卽死或議以故殺汝懋從容一言使吐實得減死論一媪有布在機夜失去媪愬外人盜汝懋往視之獨鞫其婿使首服後果得布人問之汝懋曰吾視其竇不可以容人而室中他器無

所取故知非他盜聞者皆歎服縣多虎或入市郭爲民害  
汝懋齋戒禱之神明日衆見虎浮江徙他境嘗宿南鄉廣  
巖寺聞虎咆哮汝懋衣冠夜起禱之如前時朝有樵入山  
見虎伏地臥集衆逐之乃死虎也歲比旱汝懋行赤日禱  
雁潭見雙雁飛舞導前有雲勃勃起潭所雨乃旋作後復  
禱十龜潭有龜浮水出甘霖大至汝懋之爲政類如此在  
任五年以老病乞致仕卒

案乾隆志云卒於鄞年六十二

九靈集

吉雅謨丁西域人至正十七年舉進士爲定令值方氏僭  
據慶元路軍卒驕橫剽掠村落丁不避豪勢獲其渠魁一  
人格殺之餘衆斂迹民賴以安時征賦煩苛一以公平科  
辦民無重擾陞奉化州知州尋調昌國卒於官

嘉靖志

許原闖人由諸生爲定海縣丞時西北用兵調發無虛日  
歲修治海舟難以數計而官直不之降或降而爲胥吏所  
欺隱每事第差民之中次者一二人以主其出納謂之庫  
子凡所費用皆令其代輸期會迫促至日受榜笞不恤也  
以故歲做民產恆數十家原惻然曰是豈爲民父母意也  
卽詣府請其直集里役之長分授之俾售其物次第歸之  
庫爲召集人匠造之使如法吏皆不得有所與僅令持筆  
治文書以防稽勘是以功成而民不擾縣以業海爲生自  
民船不出海所恃以存者獨田租然里役無藝民甚病之  
原曰救弊之急孰甚於此者乃取其田分計之受差之家  
悉準田之多少田多者應重差而不可辭田少者稱其出

而不得橫擾中下無告之民遂以少瘳其他宿弊未除止  
正其尤蠹民者餘皆聽其自新或有所笞罰雖豪劇吏苟  
得萌弊一切摘發窮治之不恕諸吏視原皆側目潛以他  
計出原會慈谿缺令府檄原攝令事原治慈谿如定海不  
一月而大治未幾丁父憂去原爲政以平易質實爲務而  
尤謹持其廉行一錢之費必已出民以飲食進悉卻之自  
奉寡約甚菅屨徒步不問道里遠邇以爲常日食飯一盂  
蔬二味非公享酒馘不入口視民如子女與之語款款若  
恐不得當其意以故民之愛原亦如子之於父母云

九靈集

明

包莘字尹耕鄞人天性至孝弱冠通六經尤精於詩宋濂

嘗爲之推轂元至正間舉經明行修任定海教諭作新啟  
廸寒暑不懈與象山教諭王厚孫張原楷皆有詩名人稱  
爲四明三先生方國珍亂卽致仕入明因忤旨謫西安府  
掾越二年詔諸流寓就試本道登陝西鄉薦明年成進士  
授湖廣新城丞以註誤免有蛟川集藏於家

成化志

案舊志謂莘與令汪汝懋大修學宮語在劉仁本  
定海縣興修儒學記今閱記中祇云教官包莘持  
狀謁記無與令修學宮語故刪之又舊志名宦列  
莘於元然莘旣入明成進士官縣丞則係明人不

得繫於元已

聽思  
堂案

杜彬本姓邵曹縣人洪武元年以人才爲定令經方國珍

亂後邑城殘破彬至勞來安集百務維新葺學宮建壇廟  
尤彰彰者秩滿內召去百姓遮道攀轅不可得因留其子  
遂家焉後復姓今所稱義門邵者是

成化志

何公肅河南人洪武十年知縣事廉勤自勵催科不妄施  
鞭朴創永豐倉費不涉於民田野閒不識吏秩滿去行李

蕭然

成化志

陸本字思名長洲人洪武三十一年由人材授邑令先是  
瀕海塗田堤圯海潮日侵遂連歲無秋民困於漕租且徭  
役相仍逃亡者衆本蒞政月餘招諭復業減其差役修築  
隄岸給以牛種俾力農務民得安生

成化志

許伯原樂安人洪武閒授定海丞以章製一小圓牌書慎

獨二字置懷中操持清修遇訟則曲爲開諭使自相和解  
固周常虛縣北有障海石塘十餘里年久傾圯度材修治  
完固民賴之立石記焉

成化志

高敏徐州碭山人精敏強幹通曉法律知詩書由人材薦  
授官洪武三十一年爲定海河泊司以復流移革宿弊爲  
己任屏斥常例茹茶啜糜甘清約以自守一切積蠹爲之  
剷剔歲徵月額不煩程督而自辦流亡盡歸公私稱便監

司屢旌其能陞工部郎中

嘉靖志

馬興穿山百戶永樂二年四月倭寇至興與戰死之

成化志

賀懋山東臨清人天順六年由舉人爲縣令廉正自持豪  
強斂迹與指揮劉福展登街衢民無所擾時稱爲賀青天

在任四年以憂去

嘉靖志

余斌合肥人爲處州衛指揮使宣德五年調定海衛建義學延師儒令官家軍民子弟願學者咸肄業焉自撰公勤廉謹四銘書於廳事以自勵城南海山有大決渡常覆舟湖人爲文祭其神後遂無患七年陞浙江都指揮僉事

嘉靖志

宋宣福建侯官人進士成化十一年尹縣律已以廉馭下以威告諭條約殷勤懇至動以福善禍淫之語吏不敢欺民咸知勸植旱徒行自責誠心動天歲復獲登六載績聞檄召赴京

嘉靖志

陳純莆田人成化間由舉人任教諭師式先賢模範後學



諸生多受其誨益署縣數月民不擾而衆務舉卒於官士

民祀之先賢祠

嘉靖志

李廷儀字鳴鳳閩縣人宏治五年令縣宅心正大敷政寬

平在任六年民父母之陞順天府通判

嘉靖志

錢如京字公溥桐城人由進士知青田宏治十七年以才

堪繁劇調知定海持廉秉公興滯補敝吏畏其明民懷其

德歷三年徵召爲御史官至戶部尙書

嘉靖志

陳軾字子敬湖廣人正德元年由進士令縣迎養父母事

必咨而後行值災傷勞於撫字停賦稅緩刑罰弛營繕民

咸德之尤加意學校每月朔必給油炭以資肄業今文廟

銅爵簠簋皆其所製也徵召赴都仕至京兆尹

唐志

鄭餘慶字崇善閩縣人在德十五年由舉人令縣勞心撫  
字不務繁苛嘉靖二年日本入貢構隙倡亂餘慶嚴爲防  
禦賴以牧甯明年亢旱徒跣拜禱大雨隨渥葺學宮置學  
田建廨宇陰陽醫學火攻庫作石方張鑑二硯及新興開  
時蓄洩以溉田疇表揚貞節及獎繆廉五世同居以風頑  
臨五年夏大疫捐俸市藥多所全活至冬大祲陳荒政十  
事不待命下先發廩食其疴羸者又嘗聘辭俊纂輯縣志  
躬爲裁訂師事郡人洪貫張琦梓其詩儒術吏治稱兼優

焉

唐志

田維字大常湖廣人正德間由舉人任訓導爲人謙和學  
博才充施教有方諸生多所造就在任六年陞上蔡教諭

嘉靖志

戚繼光字元敬定遠人由登州衛世襲歷任浙江都司僉書會倭寇浙東補參將守定海繼光多將略善訓練建議謂用義烏人一旅可當三軍督府從之令召募三千人以南方不利長驅乃間長短兵夾振而進立隊長偏兩之法攻距擊刺互用名鴛鴦陣倭望見旌旗卽辟易所向取勝海上賴以安靖邱府志官少保左都督

俞大猷字志輔福建泉州衛世職嘉靖十四年武進士官參將倭寇猖獗調防甯紹台溫四郡上方略謂攻城當用閩中樓船爲長技總督王忬從其策時汪直據烈港勾倭爲患定海最爲賊衝大猷連敗之松門普陀烈港昌國臨

山觀海諸處擒斬四千溺者不可勝計賊自是不敢犯定海三十三年陞南直隸副總兵士民請留不得立祠祀焉三十五年夏以署都督僉事充總兵官鎮守浙直駐定海時舟山之賊積歲不能下大猷密遣裨將張四維縱火襲之斬賊一百二十晉都督同知新倭入沈家門發兵擊之俘賊五十二戰小姑渡斬首二百四十總督胡宗憲誤聽讒言劾大猷違節制縱賊不追逮赴詔獄大猷疏辯上釋之生平善談易精劍術好謀持重用兵四十餘年未嘗挫衄與戚繼光並稱中葉名將

邱府志

盧鏜字子鳴處州衛世襲指揮嘉靖三十八年以都督僉事充總兵官鎮定海晉都督同知夙嫻韜略久於浙直履

破賊鋒督府倚之及至鎮年近七旬時倭氛漸平鏗與海道譚綸謀城招寶山力肩其役三閱月工成名曰威遠樓櫓雉堞成屋器械畢具屯兵其中扼海口以壓敵衝與縣城相犄角形勢益固由是賊不敢近未幾賊有突南洋者鏗督兵邀之斬數百級在任四年致仕

邱府志

劉錦字朝章溫州衛指揮嘉靖二年擢備倭都指揮駐定海是年夏日本貢使自郡城相警殺焚掠郊原已乃搶舟突出關口錦倉卒督師追勦時遠近士女避難入城者甚衆錦指掌印指揮李震與縣令鄭餘慶日以城守付二君惟百萬生靈是圖予當討賊耳遂與賊戰於霍山洋自辰至申不解錦手發矢斃數倭我舟乘風潮薄賊舟膠不可

動已而戰棚陷士卒多墜水死賊踴躍過舟錦揮及奮格  
力竭墜水呼曰受朝廷重寄惟有死耳竟沒於海賊創甚  
遁去臺省交上其事詔蔭爵指揮使俾世襲焉

邱府志

周懋常熟人進士嘉靖七年令定海首進父老於庭問所  
欲惡而興除之邑故業海時海寇肆暴官爲厲禁且歲比  
不登民胥嗷嗷懋曰茲民之所以爲生也卽弛其禁民其  
賴之徵科則置廠縣庭坐區長其中令民赴納懸鉅於前  
有過取者民卽鳴以聞夜則封議存庫鄉無催科之擾官  
無督責之勞而侵漁斂迹其作興學校曲盡鼓舞之術泣  
政甫期年暴卒於省闈民至今思之

唐志  
彙

龍德字伯貞武陵人由舉人官甯波府同知署定海篆

時縣中羣不逞百計爲伍小偷大掠恣意淫殺民患苦之  
德孚以方略擒其盜魁餘皆散去閭里晏然復查匿田清  
糧額抑請託革供張逐娼妓滅輿隸賑貧乏以卹無告罪  
強梗以懲不率不數月政化大行

眉隆撰碑參  
雍正府志

劉孔愚字可明永新人博學善詩文年弱冠以禮經魁鄉  
試念母矢節侍養十餘年嘗受學王守仁嚮往得其指歸  
嘉靖間爲定海訓導造士有方捐餼以資貧者兩爲省闈

同考皆稱得士擢甯遠知縣

永新縣志

曹一和江西瑞昌人嘉靖中由明經爲邑訓導踐履純篤  
博通羣書日與諸生齎齎講解爲文不喜校葉專求實用  
聲色貨利未嘗一置諸口歲時餽遺俱辭不受生徒貧者

推所有以周之助其婚葬攝教諭時輸粟入監者必餽金  
方得脫諸生籍一和陽受而還之所入俸僅給糞殮羨餘  
卽葺學宮培形勝晉無餘蓄清苦仍如寒儒卒於官士咸

哀之

唐志  
彙

金九成字鳴韶武進人進士嘉靖二十四年爲邑令持身  
清謹人不得干以私時海寇猖獗編立保甲創置整堡積  
聚芻糧設畫樹防具有規式又巡行郊野相地作碑以障  
斥瀆民甚賴之定故魚鹽貿區多拔藉權貴以冒關禁九  
成力爲阻抑令行禁止以此府怨左遷

唐志  
彙

康良臣黃岡人由吏員爲典史嘉靖三十二年倭夷入犯  
良臣率義兵禦之斬首三十餘級身受重創遂戰死手戈



馬上不墜事聞蔭一子入監

黃國縣志

宋繼祖字汝孝漢州人進士嘉靖三十五年爲縣令時倭寇充斥邑大繹騷總制胡宗憲提兵至定關繼祖供給軍儲無闕兼嫻韜略嘗披甲戴盔率先戒行金塘舟山之捷皆與有績焉在任三年葺公署廓學宮築湖塘爲士民興利先是崇邱鄉田引鄞東錢湖水以資播藝舊有蛇堰逼小泱江一洩則水勢若建瓴盡注於江故河渠與湖水未旱而先涸農人病之繼祖躬履其地去舊堰二十里所地名東崗築堰其下又去堰二十餘步築碶堰以蓄水碶以洩水於是東崗以上江盡爲河漕渟益巨不惟崇邱無旱患鄞之七鄉亦被其利後陞兵部主事改御史

唐志

何愈廣西富川人嘉靖四十年由舉人爲邑令邑之靈巖  
泰邱二鄉地濱海舊設隄二十餘里謂之千丈塘內占田  
可數萬畝立碑五久之海水吞齧塘碑相繼圯斥植浸淫  
年比不登愈覈占戶量田出資驗丁發徭修塘及五碑大  
浚諸渠引以溉田復修靈緒黃沙關舟山平水關定之水  
利悉舉焉颶風損學宮愈重修之并改建祠宇及新左右  
諸坊邑志自正德間纂於邑令鄭餘慶幾四十年至愈再

葺之云

唐志  
彙

詹近陽杭州人世爲衛千戶膂力兼人官定海把總持已  
廉與士卒有恩信海上自嘉靖庚壬後倭難稍創然猶時  
時入寇近陽領水師大小數十戰每戰功輒冠軍以不善

逢迎竟久不得超擢而聲譽特著定人以其美鬚髯皆稱

爲髯將軍云

文集

章光斗字月鹿泰州人工古文詞以歲貢授定海丞謝徵

收常例卻視艦餽金暇輒作賦吟詠邑人稱之

揚州府志

趙思基字雲澗粵東人萬曆五年由舉人爲邑令時巡撫

視師海上駐臬司行署前令議拓民廬建開府市民惴惴

不自安思基乃周覽城中得城隍廟西蔬圃地遂經營其

事府成而閭里安堵如故又徵糧設櫃收法民甚便之爲

政嚴明胥吏無所容其奸以中蜚語調去民閉城留信宿

始得行送者皆環哭失聲

府志

丁鴻陽字衡岳丹陽人萬曆十一年進士知閩之大田縣

有惠政御史奏舉卓異二十一年調繁定海修黷序銳意  
作興文教置學田以贍之周知閭閻疾苦樹利去害適巡  
按行部至條上六議皆實心爲民巡按廉其治行及入都  
疏列循良吏置鴻陽最高等先是明初籍民居沿海者煮  
鹽歲入其課實邊而蠲其田之丁凡之潮齧地窪不復產  
鹽而課如故於是貧無田者多流徙有餘田者徼重免奸  
者又詭民田以自占鴻陽計所免之數與所課相當請一  
切無免卽以所徵充貧者之課遷民自此復業焉邑西南  
屬於郡凡五十里而遙渠淺不可慨歲少旱則無秋鴻陽  
行視渠歎曰故址在直十日浚耳遂親自畚插率民浚治  
渠成民賴之復出公帑增築城垣政聲大起陞吏部主事

文集

集

王嘉賓來安人

案乾隆志作安東人

風度卓犖不羣萬曆十二年由

進士知定海勤於撫字忠誠待民民不忍欺性剛才敏不爲權勢所撓時朝廷新設總鎮於定關鎮帥欲以庭見禮隸令嘉賓曰文武不相屬此國制也又軍餉故貯於縣帑嘉賓親自給散使諸弁不得朘由是積與帥忤監軍者又左袒鎮臣嘉賓遂調諸暨代者爲時偕行遇於塗謂之曰吾已力諍定賓主禮矣君去毋自屈爲後人所訾也尋以兩臺廉其賢擢御史

乾隆志參來安縣志

時偕行嘉定人由進士授諸暨令萬曆十四年調知定海

明年奉部檄經量田地山蕩履畝躬親奸弊釐剔殆盡十

六年邑大饑道殍相望設法賑濟全活甚衆他若射圃社學皆其創舉召補御史有生祠建於縣治之東並樹碑紀

績云

唐志  
彙

汪應泰臨清人由進士初任諸暨破巨奸剪劇盜有能聲萬曆十七年當事以定爲巖邑調應泰來令值大祲之餘多方惠濟饑民賴以存活邑有興作無不力任之時颶風發官舍廊廡盡圯應泰曰椽桷不完何以壯國容哉於是首堂宇及廟獄亭坊溝井次第就理百年簡陋煥然重新洳定五載內召爲刑部主事

唐志  
彙

鄧全性字定甫一字心印廣西全州人萬曆十九年舉人任邑教諭磨厲諸生務先行誼督學嚮所旌士多浮名全

性獨采實以告鄉賓亦必慎選其人梁氏一門皆建文朝  
殉難尙未祀鄉賢祠全性與邑紳薛三才請之當道以補  
缺典所品題諸名士率後先登甲科攝象山令寬賦斂平  
訟獄凡數月未嘗輕罰一鍰及回任猶蕭然廣文故橐也  
二十九年遷健爲知縣

文集

劉國縉太和人進士萬曆二十四年爲郡推官

雍正府志

嘗權

定邑篆爲政務在質行征科量所輸令後先自上不刻爲  
期會又盡汰其羨以絕吏奸輸者益便賦稱最民有訟先  
諭解之而後折以理皆帖然服勸獎諸生朔望課文親自  
改削絕無倦色攝任五月不煩民一錢亦未嘗以徵賦

一人闔邑俱感頌之

文集

樊王家字忠虞潛江人進士萬曆三十三年由玉山調知定海天性邁越洞達民情銳於除害邑中惡少爲之屏迹馭吏尤嚴嘗言民猶鼠也猶多畏法胥吏則狐也媚而有所傳無所不毒矣受計則牟賦稽籍則殺戶守藏則家於帑偵盜則藪遁逃勾攝則亂雞犬譏闕則脫商賈凡此皆緣所事以毒民者也由是吏之桀黠者悉論鞠如法旣而興河渠修城垣營學宮育士子以善政課上考遷去

文介集

文在雙字鼎銘東安人萬曆三十五年爲郡通判攝定邑篆最久天性愷悌遇事整暇明而不以察廉而不以刻清靜無事而民自安待士尤優其治定以最稱蓋教化之功寬和之效也

文介集



陳懋齡深水人，事寡母以孝著，與人交必敦行，誼萬曆三十六年由明經爲邑丞，清恬不擾，多惠政，督修崇邱永濟橋，事無鉅細皆躬親之，役竣人咸思其功，賢名不遜於趙時丁三令邑，以丞祀名宦者，自懋齡始。

唐志稿參  
文介集

俞某萬曆間爲邑主簿，值歲祲，郡守命發帑錢告糴四方，遣屬吏任其事，某與焉，得穀最先，至會巡按以邑城逼海，田苦潮汐激射，下令築隄浚渠，以役屬某，時當暑月，止宿隄上，不少休工，遂速竣，以最遷王府官。

文介  
集

黎民表字石洲，南昌人，萬曆三十七年由舉人爲邑令，時條鞭法雖下而郡縣不盡遵行，定邑民病雜役，里甲弊於催符民表一以條鞭爲程徵解，皆自任之，百姓惟計畝輸

錢而已後令循其法前此軍民雜居火攻器藏民舍臥不安寢民表議遷之城北治局中邑民守廣安倉者風雨雀鼠耗食無以逃責民表始爲募役而官主其出納他若葺邑乘置學田完城郭惠利甚多至其操守廉潔絕不以公帑潤橐中性尤寬和嘗發得錢穀姦筭庭治之不以罪狀聞或曰聞可見績民表曰致人於罪以章前之愆而自取功吾不爲也凡民表興事必熟究利害利不百不易政政不久不更令未嘗以己意率有所興革居官惟知恤下不急於獲上衆咸頌之後兩膺臺薦將以最遷官丁內艱去士民爲立生祠碑并肖其像於梓山麓祀之

文介集參  
唐志橐

劉宗堯字漢平世官甯波衛都指揮宗堯年十九襲職儀

度風雅善射能文萬厯三十八年督漕運三百艘嚴禁左右杜絕諸弊無一折閱擢定海臨觀備倭都司汎守臨山衛衛舊有土城宗堯堞以木溝緣之溝外築壘海寇蔡三峯至見而驚去宗堯曰此其志未厭也將伺暇以攻我乃伏兵五百人於烈港諸處分舩艦三覆待之無何寇引倭夷二百人抵城下中流礮響伏兵叠起城兵應之賊殲焉明年陞廣東雷廉參將署副總兵大盜劉香縱橫海上宗堯陰招別盜鄭芝龍歸降值香來犯宗堯親自致師引香入營芝龍遂過香艙香方大駭宗堯發一矢穿其頤香乃就擒兩廣總制上其勲宗堯旋病卒年四十二

天恩集

顧宗孟字巖叟吳縣人

案乾隆志作長洲人

萬厯四十七年進士爲

邑令性警敏凡人貌與姓名及筆迹一經目輒不忘每所  
摘發如神明遇事敢任天啟元年部檄定鎮陸卒千餘人  
援遼時承平久兵皆驕惰聞遠調卽大譁縛其本管首領  
燬民廬舍勢幾不可遏宗孟挺身慰諭之衆素懾風裁遂  
戢徐肅隊而行邑河渠西達慈谿者濬自時令偕行南達  
鄆者濬自丁令鴻陽歲久且淤宗孟併濬之又濬江南諸  
渠前令黎民表之行條鞭法也好宄無所售衆有異議宗  
孟不爲撓阻一切遵行民困爲蘇居官自奉廉儉日供不  
過錢數十文未嘗市縑帛卽所需布素皆平市或僞增直  
亦隨給不問也邑人因相戒無欺令君云郡嘗檄宗孟權  
關稅得額外羨五百餘金悉以繕學宮善造士隨其所長

獲品題以知名者甚衆四年以秩滿治行高等徵爲御史

文集

趙養冲字亦霞開平衛人

案甯波府志作灤州人

天資敏穎下筆萬

言由選貢爲陝西醴泉知縣萬曆四十一年以最陞甯波通判署定海象時值島夷初定督府辦理善後芻粟器械所司絡繹追呼養冲應之裕如文武大吏倚之爲左右手巨猾王萬金倚權瑞勢畜養凶徒殺人都市占良家婦女攫金先後不貲閭里咸患之御史入境羣愬其不法狀事連章奏遂檄定海縣捕萬金下獄然御史中實恇怯懷兩端且逆意捕者必以萬金逃匿爲解也而養冲奉檄大喜選諸役強黠者約以軍興法仍繚紮其妻孥以質萬金

之懼免郡翰林某闕說爲之治具設珍羞饗伎外槃碗杯  
匕皆黃金主人酒闌道萬金希冀意筵器什物聊費以充  
下陳養冲佯爲不解翌日督隸益急而捕者已逾三日期  
養冲責各備棺先取所質代罪人死捕役叩頭流血願報  
效明日逮萬金伏地下稱囚又兩日並其兩子亦銀鑄至  
養冲乃集諸被害家鑄公門焚香告神鞫得淫掠貪贖狀  
竟杖斃之尸出居間貴人竿牘山湧潮入而萬金先死矣  
讞詞上御史以拂於巨室僅遷楚王府長史養冲自知仇  
直不容於時謝官歸

韓廣業撰傳

朱德孚雲南人萬厯間

案乾隆志職官作天  
改名宦作萬厯互異

以明經任

簿不挈眷止隨一僕居官清白令顧宗孟重之薦署奉化

篆諭民以體認天理爲要旋定日行李蕭然兩役人舁一筐餽令啟視乃筍也笑而受之嘗同僕種瓜蔬以自膳遇丁社得胙輒沽酒延諸生共飯曰不敢獨享其廉介如此

後以艱去服闋陞知縣

唐志

顧充字廻瀾上虞人萬厯間由舉人署教諭才性穎異於書無所不讀嘗集諸生講論經史邑士皆知好古在任著厯朝捷錄字類辨疑雋語諸書行於世

唐志

安世鳳河南商邱人博學風雅萬厯間以進士爲御史謫甯波府通判署邑篆甫數月作士愛民多惠政民建祠於譙樓前嘉定橋之右

唐志

孫錫爵字鼎石世襲杭州衛指揮僉事天啟間爲定海鎮

中營善於拊循得士卒心會遼瀋淪陷兵部徵四方兵甚急蛟關水陸伍籍以二萬計錫爵簡閱各營拔兵衆以遠行冀邀厚禱竊竊相偶語他將又督之嚴遂羣聚而譁時鎮府方以人言移病在署不出錫爵獨身調劑其間凡數日稍戢而水軍之畢汎者復起衛軍亦鬪而效尤勢益洶洶如焚錫爵乃默運苦心以弭其變大計定營軍則反用魁以制情定水軍則密用陸以制勢定衛軍則顯而合水陸以制形其方略如此而亂者竟帖然錫爵之功也尋陞

江西都指揮僉事去

文集

許成章字石虹長洲人進士天啟四年爲邑令德性醇和勤於課士文有不中題解輒改削之其所甲乙靡不屢諸



生意又以邑多軍伍視之無異於民方中營之復也主者欲少減其餉成章謂所省幾何徒滋口實不若益之以見德也軍餉仰於慈邑值歲祲苦糴請半折成章拒之曰豈能使荷戈者半餓而守望且安所告糴乎水軍獲盜海外鞠者過聽而欲縱之成章獨言何以責後獲卽有疑可矜亦宜酌加以罪庶無姑息之弊時議者競言開墾金塘成章與郡守計毋徒空言害興之爭第翔其價以召募民無應者議自止矣會浙撫欲移定海守哨之師以守舟山總兵者難之成章力言舟山爲定邑保障移守較便其擘畫中窾類如此在任二載靜以定紛百姓晏然以考最去文

竇若儼關中人天啟間由貢士署訓導性愛士諸生貧者  
卻其餽遺兼資以膏薪之費有婚喪必助焉陞縣令去

唐志

案

任中英字卓凡陝西人武進士崇禎元年由西安衛指揮  
積功陞浙江總兵駐定海令簡而易從寬大不爲苛察每  
行事處已必調人情酌土俗對部卒未嘗有悔言不嚴而  
威在任半載軍士咸愛之同時總兵何某紹興人郭某河  
間人皆治軍有恩云

文集

廖鵬舉安溪人崇禎二年以舉人爲郡同知攝定邑篆操  
守廉潔才思周密嘗有以殞命訟者吏請逮之不應託言  
他事出及途而移其地既至訟者與證者及左右旁觀者

皆倉卒無所施巧因得其情卽立爲平遣兩造皆保護其  
家會朝廷議開墾或指山海間曠土以聞上官檄鵬舉行  
視去邑治百里而遙數經複嶺乃屏輿從步歷之報曰土  
誠曠然皆緣山之沙積與並海之瀉鹵萬不可耕徒遺百  
姓害無益於國也事遂寢其不欲多事擾民率如此

文集

龔彝字和梅溟之保山人進士崇禎二年爲邑令

案辭三  
省撰龔

侯內召序言崇禎己巳冬蒞邑是彝於崇禎二  
年任定令也乾隆志職官名宦皆作三年任誤

廉潔自好

私囊不名一錢以儒術飭吏治而略去邊幅與民相安嘗  
謂定民柔良不必加鞭箠吾將臥治之其爲政多因勢利  
導由是人情順而衆附土俗便而計周凡修學宮增公廨  
建鐘樓次第告成皆爲久遠之規鎮兵以餉愆期脫巾趨

郡行十里許彝聞策單騎追之兵士聞馬鈴聲曰龔侯來矣候於道左彝爲開諭遂還歸伍廵撫羅汝元聞之喜曰令牧民者也能使裨卒聽約束其居官可知特賜旌仗以表異之性至孝奉養其父畧中事必咨而後行嘗歎前任黎令之縝密顧令之精嚴以爲不可及故歷歲愈多志愈厲而治益辦以課最內召去民立祠祀之始民祠顧令於南薰門外後地至是遷其像合祀於龔祠爲誦曰前有顧家家富後有龔家家豐以比漢之召杜云

文介集參  
唐志彙

戴洪淮鳳陽人金華所指揮尋中武舉遷定海鎮中軍馭下恤甘苦不爲峭刻然未嘗少縱法定邑兵民錯居各不相隸兵于有司法問之輒瞋目誚曰我兵也其邑民籍爲

兵詰以通賦亦曠目語曰我兵也其或門卒亦敢傲縣令  
文武遂至多隙洪淮申誠諸卒伍毋輕扞綱少有犯輒聽  
有司逮治自是營伍益肅兵民相安於無事伍中嘗以他  
事起而稍譁鎮府屬其廉問主名洪淮念衆方聚急之恐  
生變姑緩之詰旦得首譁者鞭而貫耳以徇他無所問一  
軍遂安未幾遷督撫標下遊擊去之日軍民攀轅者載道

車軌不得行云

文介集

葉國華蘇州人尙書盛之孫崇禎九年由舉人署教諭以  
體認良心敦篤倫紀爲訓時鄉飲多舉素封國華謂非尊  
賢崇齒意聞邑紳莊一純居官有廉聲請爲大賓每丁祭  
俎豆簞簋極豐潔能詩善書時與諸生倡和有白泉鷗莊

諸集行世陞工部主事

唐志  
彙

朱懋華南陵人進士崇禎十六年知定海縣有政聲嘗行

鄉飲禮以謝湘夙稱孝友舉登賓筵明年南北京相繼亡

鄆人刑部員外郎錢肅樂起兵立魯王懋華率師往會尋

死於難

宗江南通志作閩闖賊陷北京自縊死  
懋華向預江干之役其死必不在北京失守

也

國朝賜諡節愍

鮎崎亭集參天  
愚集殉節錄

國朝

鄭元成字玉如臨清人

案天愚集  
作堂邑人

順治五年由選貢令定

時明孽踞舟山肆擾沿海民不安枕元成寬其徭役閭里

稍安八年官兵會勦翁洲船廠軍械檄縣備辦元成多方

設處布置得宜不苦供應得將士歡心軍中呼爲鄭百有

在任七載士民德之陞衛輝府同知

唐志

馮起龍河南人

案唐志葉云湖廣人名蒼龍謝泰定集云楚中均州人字翼明

順治十二

年由選貢任邑丞時海寇爲患入犯小浹港起龍躬擐甲

曹爲士卒先伐山剝木輓粟飛芻十晝夜不一省視署中

城賴以保自明季以來連年軍旅會勘海上供億爲難起

龍殫心力與當事圖之爲丞三載兩輸輓於京七解菱牧

軍前蕩家所有以勞陞温州同知

天愚集

邵葉槐字泰岑餘姚人讀書一目數行下博學喜談兵爲

越中七才子之一順治間由舉人爲邑教諭值海氛未靖

將卒驕橫多慢士葉槐謁見總戎常進功論及防海策援

古證今極其詳確進功作而言曰先生我師也從此敬禮  
諸生悍兵皆爲之斂戢葉槐本世宦書倉甚富多載至署  
與諸生日談經史廣所未聞士風丕振陞杭州教授兼書  
院山長以卓異薦

唐志  
葉

吳光育字公望安徽婺源人順治三年爲邑典史時東江  
潰師亂蛟關城郭空虛光育身歷村落好言撫慰民稍稍  
歸以戎伍橫行佔踞第宅言於大帥請軍與民差次衆寡  
分開而居大帥從之一日幕府下令修樓櫓築礮臺光育  
啟言官無正支民用不給曷緩須臾又命嚴核沿海通寇  
之民以報光育曰旣無發覺又無實證奈何致人於大戮  
其苦心調停類如此部民某感光育恩買一姬以進入室



則中夜泣詢之乃有夫而遠出者光育急命還諸其家嘗  
夜巡獲一偷兒繫之則密獻白金一笏光育斥之而杖責  
如其罪兵備道孫枝秀設謀陷邑令朱承命屬光育爲質  
光育白尉不敢致平民無辜以死忍以莫須有之事妄加  
長官乎及承命入獄爲具橐餽不厭又送其孥於會城御  
史知其賢檄署奉化丞會 大兵征大嵐山督餉以勞役

卒年四十二

天愚集

王召字徵先烏程人順治五年舉人康熙初由平湖教諭  
補定邑振興文教時加校月加課俾諸生咸相感勸嘗於  
堂側構茅屋三間日坐其中披吟不輟在任二年卒於署

唐志

案

常進功字龍泉遼東廣甯衛人順治間爲定海左營游擊尋陞總戎十六年五月海寇由穿山登陸至沙嶼嶺結陣十餘里以攻定城進功張蓋坐南門懸旗用疑兵數百往還江岸持守七日夜士民安堵寇不敢犯燒斷長山橋而去自此二十餘年雖島中多嘯聚無敢以樓船窺浹口者

乾隆志參  
書巖集

王元士字九山麻城人順治十六年進士康熙六年爲邑令相度山川土田浚城濠河及南北兩鄉河修築梅前兩堰改築埤埭石堰重建長山大有兩橋凡學宮祠廟軍門行府縣治倉厥次第修舉斷事一歸和平嘗曰爭平則訟自息暇則詣學課士勉以恪守臥碑邑志自明嘉靖後百

年未修因設局採訪增輯成彙十一年陞瓊州同知未及刻存彙於署而去彙中有自著河宋一篇於水利最詳悉

唐志

張玲字來雲錢塘人

一作海鹽人

康熙八年舉於鄉文名卓吳

越閒居官日著書與學中貧士共朝夕於官署東墻高處鑿窗與候濤梓蔭兩峯對坐臥其中有歷山階而上者知爲諸生某某讀書會文來也則時出所作詩文唱酬之忘貧忘老陶然自得尤工書法後人珍之如璧

乾隆志

牟大寅字洪開楚之施州衛人康熙十五年由金華副將進秩左都督駐定海時舟山遺孽未靖劫掠沿海大寅加意撫禦邑賴以安東管鄉後海石塘盡處舊有土塘抵禦

浦塘內爲河河以灌田塘以禦寇創自宋時邑令施廷臣  
歲久塘圯河塞地爲塗寇至則蠶擁以上莫可過大寅患  
之下令鳩工濬河培塘綿亘三十里長隄深塹寇不能越  
而登近塘田皆資灌溉民德之名塘曰萬弓立祠塘側祀  
焉邑營葬多於候灣山貧者輒浮厝經兵燹積骸成邱大  
寅捐貲築浮厝瘞之置田爲掃塔掩骼費又嘗修寶陀寺  
自洩定關銳意修舉至今人猶思其遺澤云

乾隆志

周家齊字二南湖廣鍾祥人國子監生康熙二十五年爲  
邑令潔已奉公以興廢爲事開水關疏河渠立義學建忠  
勳祠奎星閣置義塚又招流民給貲開墾翁洲荒土善政  
不可枚舉當其疏河渠也有議從甲上洵者有議從田上

淘者家齊獨以有田者給穀免役無田者役身受直列狀以聞大府從之議下畚插雨集閱兩月而渠遂成邑人王良才貧不能娶爲割俸以完其婚公餘與士子論文賦詩倡和丁內艱去士民如失父母送者至失聲哭家齊亦依依不忍別及回楚猶寄語邑民以循分力田爲事民讀之

皆泣下

乾隆志

蔣茂沈字研公餘姚人康熙二十六年舉人家世通顯自守謹約於義利之界判若黑素尋授邑教諭除目初下諸生陳世宗聞而色喜曰是吾龍山讀書之蔣先生自其爲諸生時授徒邑中某得常造其門談說經史剴然理解戶外之屨常滿二十年孝廉公庭固掃迹也及至任茂沈卽

以居里者居官律身者律士諸生接見浮情躁氣都消三  
十六年大吏聘爲江南同考官所得皆名士

乾隆志

唐鴻舉字磐庵歙縣人康熙二十七年進士三十四年知  
鎮海英敏勤幹字民有方尤作育人材月必有課程其良  
否而甲乙之所賞拔士樂與把酒論文有某以私事干鴻  
舉嚴詞切責斥之退仍婉容與諸生講說經義又以邑乘  
久缺偕邑士薛士學陳夢蓮纂輯成書未及梓而去今多  
所取徵焉

乾隆志

黃宮柱字擎庵福建南平人康熙二十九年由進士爲邑  
令持己清廉斷事明決縣南崇邱鄉與鄞界鄞豪民築塘  
堰截塞水道宮柱言於府立命毀之崇田獲有秋焉有船

值颶風覆於塗民不知爲官艦衆拆之鎮帥訴於督撫欲置之法宮柱以風水漂泊小民無知其覆事遂寢又關稅多重斂駕盜稅名欲陷監生賀某宮柱力辨其寃民感德之肖像鐘樓與前明邑令龔彝合祀焉後陞吏部主事

乾隆志

林徵徽字君慎康熙三十七年由舉人爲教諭以興學造士爲任每月朔必集諸生講藝反覆闡揚經書咸思充然有得經指授者多知名士有青衿爲武弁所辱徵徽親詣軍門辨其誣又泣訴於上官寃遂雪陞温州教授五十二年爲福建鄉試同考官

乾隆志

蔣名世字洲六嘉興人康熙四十一年由歲貢任訓導嚴

區土類謂樹木必芟樗櫟藝穀必去稂莠所以扶善類也  
見士之敦行立品者和顏以接常與談說經史情意日篤  
外此佻達之流則色笑無所假或有毀之者名世亦置弗  
辨曰我安能依阿從俗使此席爲納污地乎託疾以歸邑  
士贈之詩曰霽月光來恆滿座西風塵起不污顏蓋重其

高致云

乾隆志

田長文山西高平人康熙五十一年由進士爲邑令政簡  
刑清庭無私謁示民孝弟勤儉修社稷壇建先農殿立關  
氏三公祠皆親自督率不日告成又設崇正書院置田二  
十畝有奇爲師生膏火資在任十二載舉卓異將去恐後  
頽廢詳大府勒石以紀士林翕然稱之

乾隆志



楊國幹江蘇人雍正元年由諸生以賢良徵旋爲邑丞與  
王諭張懋建張懋延最契性喜吟咏絕不向上官乞案牘  
以擾閭里嘗攝邑篆公餘猶手執一卷玩視不輟也同時  
縣丞譚世選貴州人拔貢生爲人坦易質直雖入仕籍依  
然如貧諸生有雁字詩三十首後移丞慈谿署象山縣又  
有典史杜琦江西人亦能詩與國幹世選皆下吏中之操  
守廉潔酷嗜風雅者異乎今之簿尉終日與胥隸爲伍而  
惟知暮夜苞苴也

蛟川詩話  
參采訪冊

趙應召遼東襄平人雍正八年由選貢宰鎮邑率僕一人  
航海而至書策琴劍外無他物蒞任月餘處事敏決政必  
持平吏不舞文民頌之爲趙父逾年調任蘭谿士庶千餘

人祖道流涕戚依 依不忍別

乾隆志

洪熙揆字惕菴臨海人歲貢生雍正八年爲邑訓導鑄朱子白鹿洞教條分給諸生曰讀書修行必本乎此其居官尤果於有爲學中當務事振作不肯少待嘗董葺黌宮并監修碑堰不以爲勞每謂食一日俸一日無所事我愧也

聞者重之

乾隆志

邵向榮字東葵餘姚人雍正十二年由進士任教諭持躬端重課士諳諳以孝弟相勉衡文根柢經史首崇實學士之請業經指授者多成宿儒蜚聲上達其佻撻敗類爲庠序玷者必請於學政而讎其給士習爲之一變乾隆十七年借邑令王夢弼纂修志乘著述出其手裁致仕後諸生

祠之奎星閣下迄今後學猶思慕不忘

陳志  
業

馮大位字行素臨海人乾隆元年由明經任訓導年已七十有七端重不苟言笑然士有請業者卽之則和光可挹指教不倦時聯同志登高眺遠分韻賦詩所著有章安高士傳及兼山文集渾樸不事雕飾如其人年八十致仕歸

乾隆  
志

胡隆字景初海陽人事親以孝稱由寶泉局大使爲涇縣丞丁艱既除服補奉化丞嘗攝鎮海令事居官有仁恩值綿蟲爲災因野厚積數寸隆齋三日諫告於城隍之神蟲遽熄滅一時謠語驪然謂仁人之感冥漠如呼吸通也

文  
傳

楊玉生陝西三原人乾隆七年爲邑令銳意文教與邑紳張懋建倡建蛟川書院使諸生謝霞祚王謙吉鄭朝宗范用賢等董其役越四載工乃竣先是玉生每月會多士於署中課以文藝建書院既成乃延進士謝閻祚爲山長士之來肄業者按月程試其院中膏火則勸紳士各捐產助之不足又詳請穿山傅家硯下官灘准民陞墾以贖書院其樂育人材之意最爲周至云

蛟川詩話

王夢弼字代言一字惕庵商邱人乾隆十一年由選貢爲邑令操守廉潔尤勇於任事百廢具修先是後海塘兩經潮衝隄堰多圯至十二年秋颶風大作其害尤鉅夢弼詳請大吏發帑改建疊石排椿凡八百餘丈完固多倍於前

工閱四載皆躬親巡視不憚勤劬復以公帑餘錢修築鉤  
金塘石江塘滙頭塘及東管之善慶塘靈緒之龍山利濟  
諸塘增長縱高民賴其利十六年邑遭旱祲勸富民出粟  
平糶開厰煮粥老稚全活無算江南鄉頻有虎患夢弼禱  
陳山神使健卒捕之越二日擒其二虎境遂以安邑志剋  
自明嘉靖間百八十年未修夢弼延學博邵向榮董其事  
相與博採旁徵成一邑之信書在任七載陞姚州知州去  
士民感其德肖像祀之踰二年卒於官年六十八

陳志  
彙

荆德瑗丹徒人監生風期卓犖積學好古尤長於詩古文  
詞乾隆三十四年由試明經授邑丞於釅政碑闡兵糶決

訟事事稱其職人

皆頌之

陳夢蓮  
撰序

周樽字壽南雲南昆明人乾隆三十九年由舉人爲邑令  
操守清廉每遣隸下鄉不擾民一錢尤勤於聽訟才思敏  
達臧決皆得其平最惡門丁攬權曰此奴也職主司聞豈  
可聽其一言遇紳士以私事請亦必嚴斥之又悉心水利  
南北鄉諸河歲久淤塞令民計畝派濬限以程期雖遇盛  
暑必躬往督察深廣較倍於前書院田畝所入僅供院長  
修脯之資乃捐置膏火田三十九畝俾諸生得以肄業朔  
立同善院卜地西郊外構屋以貯柩建塔以收骨施舍棺  
木置田八十畝垂之永久其他葺武廟創建火神殿忠勇  
祠及龍神林府瀾浦諸廟修廢舉墜政績甚多七載陞同  
知去邑士民肖像祀之累官至安徽布政使

陳志

陳焯字暎之別字無軒烏程人少有文名受知於學使王  
燕挈之入都名重一時乾隆間以歲貢生官邑訓導歷諸  
縣教職所至必識其賢豪拔其髦俊以撫其地之掌故嗜  
古博物欣然自足人以爲浙東之行秘書也

湖州府志

胡龍光嘉慶初由舉人爲教諭學問淵博諸生有請業者  
詞氣藹然答之必詳凡自閩洛性理馬鄭箋注以及唐宋  
人詩文皆歷歷指諸掌上談久與諸生酌則清酒一壺鹽  
菜數碟真率如寒士閒居正襟危坐終日無倦容雖妻子  
臧獲亦不見其喜怒有司逢歲序致學官米數石龍光輒  
卻之謂隸曰宿糧尙未盡待瓶罄吾自來取歸語汝主人  
且將去作鶴料也其廉介不苟如是

宋訪冊

戴彝字松門安徽休甯人能詩尤善畫由監生捐授蘭谿丞嘉慶十八年升知鎮海縣縣西北有中大河自康熙二十六年疏濬後久淤塞彝集紳耆諭諸有田者通力挑之削五尺杙爲去淤之度令深必如杙日往巡視勤有犒情有罰凡挑濬六萬二千餘丈兩閱月而工歲旱潦有備邑人頌之

案蛟川詩話副貢生洪炳交有頌戴松門大令德政詩

歲出數百金劑方藥

活病者增鯤池書院膏火歲歉則捐俸爲富民倡哀數千金買米減價而糶爲糜以食餓人二十三年海疆倭滿加通判銜會靈峰寺僧假葛稚川仙蹟以惑男婦遠近聞集蹂躪傷人或寄宿寺中姦宄無所稽彝請於大吏械其僧禁民無或至寺有受僧嗾使者構譎詞動大府彝力爭再



三禁絕之二十五年以疾卒於官年六十有三

呂瑛撰  
行狀

郭澗章字樸齋山西安邑人進士道光初爲邑令存心愷  
悌操守清約愛士卹民循聲卓著先後在任十年賑荒浚  
河建造礮堰修築城垣惠政甚多陞橫州知州去同時呂  
璜字月滄粵西臨桂人進土工古文由奉化令署邑篆亦

有賢名

采訪  
冊

李向陽字丹厓雲南趙州人由附貢生捐縣丞道光二年  
補授鎮海居官以廉靜稱愛讀書絕不向上官乞案牘士  
有謁之者與之談文而已縣令郭澗章濬南北鄉河道向  
陽以水利有關時時屏騶從督視之慰勞役夫情意肫摯  
衆益感而不敢怠在任八載以母老乞養歸送者數百人

爲他丞所未有尋丁內艱道光二十一年服闋來浙復蒞  
鎮海任八月定海再陷輪艦進窺浹口督府令向陽至曹  
江公幹蓋憐其老而使之避也向陽曰丞雖閒官有守城  
責城亡當與俱亡臨難不可苟免二十六日邑城失守向  
陽賦絕命詞二章整衣冠望北叩拜坐廳事解帶縊翌  
日武生劉朝用等買棺殮之送柩至省巡撫劉韻珂以向  
陽死狀聞贈知州銜賞雲騎尉世職

聽思  
堂彙

金萼

一作  
靈

鄞縣人由行伍官鎮海營把總道光二十一年

從狼山總兵謝朝恩守金雞山八月西人進犯蛟關潛以  
小舟載夷卒由鍵口門登岸渡小港橋抵沙蟹嶺所過無  
堵之者遂踰金雞反出我軍之上時官軍方前拒敵艦見

西人在山巔皆大驚欲逃芻拔刀叱之曰此正吾儕報

國之日有走者芻必手及之衆乃不動終以腹背受敵力

不能支與朝恩及定海游擊張玉衡黃巖千總一作王萬

隆黃巖把總汪宗賓一作宗斌解天培黃巖外委林廣吳定江

等俱戰歿於陣事聞贈卹均如例采訪冊

張振夔字磐庵樂清人高才博學工詩古文詞道光間由

舉人爲邑教諭以諸生專習入股試帖詩而於古六藝之

教置之不道設爲通藝課約曰士爲四民之首彼農工商

各有終歲正業約束其身心獨士曾無一藝焉相淬厲於

羣居無事之餘而僅以空疏無稽之學覬覦不可知之祿

命得則傲失則怨顛心倒志迄無成立而猶曰士希賢聖

藝皆末也豈不謬哉識者以爲名言適值颶風大作海塘  
多決振夔與邑人周正祥王懷茂等倡議改土塘爲石塘  
爲文募貲建築其事果成振夔有力焉性尤剛方遇諸童  
考試必嚴諭廩生毋得濫保匿喪冒籍及隸人子弟士林  
皆嚴憚之後以屢持正議與有司忤浩然乞歸介軒外集  
參采訪冊  
羅以智字鏡泉錢塘人拔貢生博學嗜古才譽著一時道  
光二十五年攝邑教諭至卽謁文廟視兩廡栗主無陸贄  
名訝曰宣公久已奉 旨從祀而鎮海學宮尙缺如前此  
教官毋乃憤憤乎趣吏立主照 欽定位次供奉之已復  
躬祭忠義節孝祠以勵風化集諸生課其文嚴定甲乙人  
人喜得師也時周正祥等旣創修海塘忌者嘖有煩言以

智作修後海塘記以破羣議曰鎮城北濱海其南面臨大江背則僅倚所謂後海塘者以界之險矣塘自城東北隅巾子山麓延袤至嶼浦三十里石塘盡七里及沙頭而止夾層石塘則不及千丈昔者塘之外尙有沙塗相抵護今沙盡洗沒不復漲矣潮直齧乎塘之根石罅齧久漸漸渙散更漸漸欹傾勢所必然或言舊塘頗堅固日修而日壞其弊有不勝言者此亦惑人之說也夫修利隄防季春有令自古未有不壞之隄防而無事後人之修之者也旣渙散矣且欹傾矣猶忍而待其潰決耶縱不爲身柰廬墓何獨不爲子子孫孫計耶或言塘工前則請發帑役鉅費繁民力恐不給夫當夷壞之後生計固蹙然合人人之力而

濟之庸遂破一人之產乎哉兵可避盜賊可擒塘一潰而不可禦矣人人之身家性命所關係區區財乎哉顧瞻推委忍不能于斷斷愚不至此蓋未有不共衛其鄉里而能獨保夫身家性命者也或言有治人然後有治法必也果足以取信於鄉里者而董治之庶幾不虛耗財力而能捍此大患歟是又不然十室之邑必有忠信而慮一邑中竟無老成廉謹之人足任事者未之信也其他善事義舉利及人而無所爲害斯則一或不慎害且大不可言已斷難逃其咎有不盡心力而爲之者哉况上有大府賢令尹身親指畫恫瘼在抱邑之父老子弟未有不踴躍爭先而耽讓善於人者也余居是邦將一月矣風雨連作潮聲殷殷

若雷晝夜不絕於耳全恃一綫險塘生靈聽命是尙可生  
浮言而不樂輸以急成此舉乎其後塘工竟成而以智早  
已去任士民多傳誦之咸豐十年省城陷以智殉難同時  
鄒志初字栗園杭州人工詩古文詞由舉人攝邑教諭風

雅愛才亦稱賢廣文云

聽思  
堂彙

孫玉田字右農湖北江夏人精易學尤長於史著有鑄史  
駢言中道光二十四年舉人以大挑知縣分發浙江咸豐  
十年由清安調署鎮海每遇月之朔望課諸生文必躬至  
鯉池書院面相勸勉文有謬者不憚改削士皆德之爲政  
亦以寬厚稱尋解任回省明年九月賊犯杭州奉檄守清  
秦門巡察不懈城陷赴郭桐園投水死

浙江忠義錄  
參采訪冊

補遺

舒謨字凱政江西樂平人永樂中成進士知定海定海鄮遠歷於兵鎮謨律已處交一出於正將弁敬服之遂得竟

所施升御史

江西通志

裘秉彝字君恆富陽人順治五年舉人署邑教諭諸生董某貧不能具贄以母之簪笄上秉彝曰爾母誠賢然吾豈父兄之弗類者哉反其贄加贈遺焉與諸生談文齋齋樽酒相對輒以陰德勸勉攝篆三年升江西盧溪知縣旋挂

冠歸

天恩集